



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8



Biswa Bhusan Harichandan-i
Chhattisgarh Angh tenangzükba agi



Mary Kom-i aniba Oversight
Committee nem hopta ana apuloktsü

VOL. XX NO. 133 (ADOK 133) DIMAPUR ROGONÜ (FRIDAY)

TSÜKLAI (FEBRUARY) 24, 2023

₹ 5.00

Chungtia nunger Imkongchiba tepseter bushidagi

Mokokchung, Tsüklai/February 23(TYO) : 14th Nagaland legislative Assembly election agitsü anogo ishika dang lia Chungtia yimtak nung February 21 aonung memeteba nisungtemi nisung 2 pur aoba tena rongnung arishi küm 34 tain Imkongchiba tepseter aliba February 22 nü nikongdang 3:ako meta Satier aser Longjongkong tsüingda yimertemi ngutetogo. Tasüsang aser par medemer na Chungtiayimsen yimtak

asüpila sentep nung dener atuba mapang nung mejangjaba nisungtemi pur aoba lir.

Osang ajanga ashiba agi tasüsang aser pa medemer tena ya 28th Koridang A/C kübok JDU Candidate Chalukumba phukumer ta jangjaogo.

Tena rongnung kabo kanga mejungi yiru saka jena otet. Iba tatalokba dak ajemdaker Police Station-II nung Case Register sür SPDO Mokokchung-i anir SIT Teloki bushitsüingdang agidagi.

February 26 nü menoknok anoktsü osang prokshiba ya tiazü: NSDMA

Dimapur, Tsüklai/February 23 (TYO): Social media nung February 26, 2023 anüingdang 12:00 ako nung menoknok second 31 anoktsü ta osang prokshia nüburtem tsübotepet. Iba dak sendakba nung Nagaland State Disaster Management Authority (NSDMA), Home Department Government of Nagaland ajanga sangdong ka nung ashiba agi, social media nung tekumdangtsü prokshiba ya sorkari mela aliba agency nungi masü aser National Centre for Seismology, Ministry of Earth

Sciences, Govt of India ama linük nung menoknok yimya asadangtsü temelaba agüja aliba agency tejangja nungi masü.

Anungji nüburtem dang tapi agi tsüboa malitsü saka menoknok dak sendakba nung NSDMA ajanga mapang shia safety measures balala agütsüba sülen maneni anidaktüsü ayongzüker, kechiaser Nagaland aser tanüingba North East region ya Seismic Zone-V aser tectonic plate boundary nung lir, koba menoknok anoktsü anasatiba, ta sangdong ajangasa ashi.

CEO-i Webcasting/Offline Videography atema metetdaktüsür

Dimapur, Tsüklai/February 23 (TYO): Chief Electoral Officer ajanga February 27, 2023 nü agitsü aliba Nagaland Legislative Assembly election atema webcasting dak sendakba nung teinyaktsütem kar metetdakja liasü.

agütsüba mesayui akok tashi tesem tuluba awajemtsüa inoktsüla, ta ashi.

Camera yagi Mock Poll, Polling Officer-i vote agütsür jangjatetba maparen, vote agütsür temeyong nung indelible ink inoktsüba, vote agütsürtem jangjatetba sülen Polling Officer-i EVM indang control unit lapokba, EVM indang balloting unit bushia voter tem voting compartment-i aiba jangja sayutsüla saka Ballot Unit/VVPAT mesayutsüla, kechiaser vote agütsür secrecy kumzükba ayutsüla, ta ashi.

NPP aser NDPP party tsüingda nung rongrong adokba aitsür: Maongkaba Ozükum

Mokokchung, Tsüklai/February 23(TYO): NPP aser NDPP tsüingda February 23 nü rongrong adokba Social Media nung ni aija prokshibaji kanga dang tai lir aser tanü iba tatalokba aitsür, ta 24th Angetyongpang A/C nung National People's Party candidate, S.Maongkaba Ozükum-i Mokokchung nung osang zülurtem den jembidang ashi.

Iba mapang nung parnok telok ana tsüingda o langzüktep, anungji iba mapang nung NDPP nungi Akumwapang-ibo NPP Maongkaba kanga mezüingmeshi aser telok ana tsüingda lung agi ontep meso aser iba mapang nung pa (Maongkaba) kümzükba ayutsü mechi nung injang anünglen katok aser tensaji süingjema adok, ta February 23 aonung Mokokchung nung NPP office nung NPP Party officers lia 24th Angetyongpang A/C nung National People's Party candidate S.Maongkaba Ozükum-i ashi.

Maoangkaba-isa, iba rongrong adoka lung agi ontepa mapang nung telok anaprongla gari terarabo raksa aser tesülen Mokokchung nungi SP alua iba tensa atalokba asadangogo, ta metetdaktüsü.

February 23 anepdang pa ozü yimtak (Mongsenyimti) nungi Mokokchung-i aturba lia pa bukumer NPP party pur yimtak nungi meindoker ta angashia aser pa Mokokchung nungi yimtaki apusoa aluba mapang Yisemyong nung par nüburtem lenmang nung ajuru aser iba mapang nung NDPP telokja liasü, ta S.Maongkaba Ozükum-i ashi.

NDPP-BJP ajanga taruba sorkar kumtettsü: Assam CM

Kohima, Tsüklai/February 23 (TYO): Assam Chief Minister Himanta Biswa Sarma-i Nagaland nung vote agütsütsüpur Naga political issue agi mesüzüka, Naga Political solution nung takok angutsü asoshi aruya aliba küm pongu ya kanga tongtipang asütsü, ta ashi.

"Naga nunger yimtenren tebilemtsü atema tangatetep kati arutsü asoshi mapang aser tashi jenti indokogo aser iba nükjidong tongtettsü asoshi taruba küm pongu ya kanga tongtipang asütsü," ta Sarma-i Capital Cultural Hall nung NDPP nungi Western Angami Assembly Constituency nung toktepla Salhoutounuo Kruse atema nübuyimba sentong nung jembidang ashi.

"Naga nunger dangar dak nungi khenyongi balaka aliba aser par otsü akumtsüboa solution ka aginer aser Naga nunger aser India nung aliba nüburtem tsüingta tesendaktep tajung jangjadaktüsiner," ta pai ashi.

Taruba küm pongu tsüingta Naga Political Issue atema teti asoshi tangatetep kati arutsü atema BJP-NDPP ajanga maneni inyaktüsü, ta pai ashi.

Menden asem nung toktepa NDPP-BJP nungi tetsür nominee tem nem vote agütsütsü asoshi mesüzüka jembidang, Nagaland



Himanta Biswa Sarma

ya 1960 nungi arudang tetsür rongnungi legislator katia inyaktüingda mali, ta Sarma-i ashi.

Saka taküm NDPP aser BJP ajanga otsüsüa telemeteba tajung agia tetsür-tebur nem kasa temeden agütsüba aser tetsür nem tashi agütsütsü indang kisüing jembiba masü saka aruya aliba anogotem nung state anitsü asoshi tetsür nem mapa nungloktüsü, ta ashi.

Tesüiba küm pongu nung NDPP-BJP ajanga Rio kübok Nagaland nem tashi tait sorkar ka agütsü. Taoba mapang yimtenren nung tejangja maliba tensa ajangshiba asenoki nguogo, saka tesüiba küm pongu nung Nagaland nung yimtenren tsütsü mepetmesü kecha meliasü aser ibaji Rio-i yimya balaka nung

tashi ita len aniba ajanga lir, ta pai ashi.

Nagaland tajungba kumdaktüsü atema inyaktüsü asoshi ajaki centre nung BJP lenirtem aser Nagaland nung NDPP tsüingta tesendaktep tajung aginer aser mezüing kümük nung Nagaland ajungtsü asoshi tamendak dak tajung yangertetogo aser aruya aliba küm pongu nung terenlok jenti angutsü, ta Sarma-i ashi.

"Taoba mapang Assam-Nagaland arütsü nung totzü atsüba ajanga Assam nung aliba nüburtem kisüing ajangzüktsü ta bilema liasü saka tangbo Assam sorkaria arütsü nung totzü agitetba nungi tajangzük ya arok terenlok asoshi Nagaland den lemsateptsüla ta angateta lir."

NDPP-BJP sorkar kumtetba sülen Nagaland foothill road ya asangsang akumtsü, ta pai ashi.

NDPP-BJP den tokteptsüa political formation mali, kechiaser danga party temi candidate tem menden 30 dak tema nunga yoka mali aser parnoki sorkar mekumtettsü ta angateta election magidang yongi parnoki tamakok angutsü metetogo, ta Sarma-isa ashi.

Iba sentong nung BJP national spokesperson Nalin Kohli aser NDPP secretary general Abu Metha nungertemia jembia liasü.

Temjen Imna Along nem vote magütsütsü tuyuba NSCN-IM lenir apu

Kohima, Tsüklai/February 23 (TYO): Nagaland BJP tir Temjen Imna Along nem vote magütsütsü nüburtem dang ashiba mechi NSCN-IM lenir Lanuwati Jamir puogo.

Lanuwati Jamir-i NSCN/GPRN totuyuba ka nung meyonngem agüja liasü, kong Alongtaki constituency kübok aliba nüburtem dang state BJP tekolakba, Temjen Imna Along nem vote magütsütsü shia liasü.

Pa ya Assam Rifles temi Bodhbar (February 22) aonung apu.

Mapang tatsüka lir Lanuwati Jamir ya Nagaland police nem amoktsü.

Iba totuyuba nung Nagaland BJP tir Temjen Imna Along dak Naga nunger anemba yimya keta lir, ta NSCN/GPRN-i aitsü.

"Pa dak Naga nunger anemba yimya ajiteta, 30 Alongtaki Constituency kübok aliba yimtsüing ajak dang Temjen Imna

Along nem vote magütsütsü totuyuba agütsür," ta NSCN/GPRN ajanga iba totuyuba nung ashi.

Iba totuyuba sülen manidaker nem NSCN/GPRN indang Ahza agi melaba ama temerenshi tulu agütsütsü, ta NSCN/GPRN-isa ashi.

Iba totuyuba nungsa Nagaland BJP tekolakba Temjen Imna Along-i asen lima nung Hindu yimsü bener aitsü kanga meranger, ta tai tonglokja liasü.

"Temjen Imna Along ya RSS

züngsem tejangja ta angazüker aser pai asen limai Hindu yimsü bener aitsü meranger, kong asen Naga nungeri Naga lima Khrista asoshi ta Tsüingrem den züngzüktepa lir," ta totuyuba nung shia liasü.

Nagaland BJP tir Temjen Imna Along ya Alongtaki constituency nung 'saffron party' nungi tokteptsü.

Züngsem 60 aliba Nagaland Legislative Assembly atema election ya February 27 nü agitsü aser vote ya March 2 nü azüingtsü.

NSCN/GPRN AJANGA JANGJASHITSÜR

Dimapur, Tsüklai/February 23 (TYO): Aruya aliba Nagaland state assembly election nung candidate Temjen Imna Along dak sendakba nung Ao Region indang CAO, Lanuwati Jamir-i meyonngem agüja aliba totuyuba ya pa (CAO) molungka agi agütsüba lir, ta MIP, NSCN/

GPRN sangdong ka ajanga ashi. Ministry of Kilo Affairs nungi totuyuba kecha zülua mali, ta sangdong ajanga ashi.

Iba totuyuba ya social media sapang sünga prokshia nüburtem mangmangdaktüsür, aser iba atema sasa bilemer, ta kasa sangdong ajangasa ashi.

Longmisa yimdak senso candidate mali: DC & DEOMkg

Dimapur, Tsüklai/February 23 (TYO): Deputy Commissioner & District Election Officer, Mokokchung, Shashank Pratap Singh IAS ajanga sangdong ka nung ashiba agi, ADC & RO 24 Angetyongpang A/C lia February 23, 2023 nü Longmisa village council ajanga Longmisa yimdak senso candidate (consensus candidate) mali aser Longmisa village council/Senso mungdang mesüra akhi tetsü-tebou tashi

amshiba tentet kechaia senso candidate shima mali ta nangzükogo.

Longmisa yimdak vote agütsütsü temsüa alir ajak dak pei tangatetba nung shilem agitsü/tokteptsü/vote agütsütsü temeden lir ta Longmisa village council/Senso mungdang mesüra akhi tetsü-tebou tashi amshiba tentet ajunga tangatetba nung nokdaka lir.

Longmisa Village Council ya

sorkar tentet ka asünung, political inyakyim kecha nunga shilem magitsü aser mapang ajak nung political tsütsü neutral nung alitsü, ta parnoki sangdong.

Political party/candidate tem election nübuyim sentong putu menden-i menokdangtsü aser tapet ozüing kübok RO/ARO ajanga melaba dak alia political party/candidate ajak nem talila talenba magütsütsü ta putu menden ajanga sangdong.

DC & DEO Mokokchung & Kohima ajanga tenokdangba agütsür



Februaruy 23, 2023 nü Town Hall, Mokokchung nung 14buba Nagaland Legislative Assembly Election atema Polling Officialtem postal Ballot vote agütsüba mapang tangokba noksa angur. on 23rd February 2023.

Dimapur, Tsüklai/February 23 (TYO): Deputy Commissioner aser District Election Officer, Mokokchung, Shashank Pratap Singh IAS ajanga sangdong ka nung ashiba agi, 14th Nagaland Legislative Assembly atema General Election asoshi nübuyimba mapang February 25, 2023 nikongdang 4:00 ako nung tembangtsü aser election tembangtsü asoshi mapang lateta aliba atemtsü ghonda 48 lia nüburtem senden amentsü memelar.

Iba sülen election dak sendakba nung nisung shingaia public meeting mesüra procession mejateptsü, mayongzüksü, madentsü mesüra shilem magitsü.

Cinematography, Television mesüra item mesükba yimyatam amshia election dak sendakbatem nüburtem dang sayuba mesüra nüburtem atsür arutsü mechi südok-sünem sentong mayongzüksü.

Election talenba makai timi agitetsü mechi political

functionaries/party workers/ campaign functionaries shirnoksa danga constituency nungi ali, parnok election tembangtsü ghonda 48 mapang pei constituency nung alitsü metetdaksür, ta sangdong ajangasa ashi.

Deputy Commissioner aser District Election Officer, Kohima, Shanavas C IAS-ia sangdong ka nung, Representation of the People Act, 1951 indang Section 126 nung shia aliba ama 14th Nagaland Legislative Assembly, 2023 indang General Election atema nübuyimba maparen February 25, 2023 nikongdang 4:00 ako nung tembangtsü, aser election tembangtsü mapang lateta aliba atemtsü ghonda 48 lia lokti senden kecha malitsü nokdang, ta ashi.

Nisung shingaia:-

1. Election dak sendakba nung public meeting mesüra procession mejateptsü, mayongzüksü mesüra madentsü mesüra mejembitsü; mesüra

2. Cinematograph, television mesüra item mesükba nung nüburtem dang election dak sendakba kecha mesayutsü; mesüra
3. Nüburtem anidentsü mechi kenten-menü mesüra theatrical performance mesüra entertainment mesüra amusement amala amshia election dak sendakba mesayutsü.

Iba totuyuba nung manidaker nisung kar danga lira, tepuokdak küm ana tashi ayutsü mesüra senchi achitsü mesüra temerenshi anaprong alitsü, ta ashi.

Maneni political mapa inyaker ajak nübuyimba mapang tembangli constituency yutsür ainshitsüla. Ajisiüaka state indang political party ktdangtsür tem iba tenokdangba küboki maittsü. Item ktdangtsür yagi State Headquarters nung pa/la aliba tesem sangdongtsüla aser iba mapang pa/la senzüsembongba ya pa/la indang party office aser pa aliba tesem tsüngta kisüng asütsüla, ta sangdong ajangasa ashi.

NPF candidate Imjongwati-i lanurtem ayongzük



Imjongwati aser pa pusemertem tangokba noksa nung angur.

Dimapur, Tsüklai/February 23 (TYO): Taruba election nung ochishia tokteptsü aser takok tajung angutsü atema renemshiba mapang ka nung 29 Jangpetkong assembly constituency nungi lanur lenir Imjongwati Longkumer-i February 22 nü Dibua yimtsüng nung lanurtem ayongzükogo.

Nüboyimba sentong nung o jembiba mapang pai, "lokto melenshitsü atema asenok tebilemdangba mezüngbuba melenshitsüla aser asenok amala lanurtem tem nungi tenzüksü nüngdaker," ta ashi.

Party manifesto tejangja aser pa amala tedangshi lenir ka

lenisüba nung nüburtem atema ochishiba yimden yimsüsüba yimya balaka sayutsü imlar.

Yimden yimsüsüba tsütsü Jangpetkong nung aliba nüburtem küm aika kanga kangshia aruogo aser yimden yimsüsür tapet ka bener arutsü atema tzüraba ajanga dang inyakyim tapet bener arutettsü, ta paisa ashi.

Jangpetkong nung aliba nüburtem aser talisa lanurtemi ochishiba politics aser lenir shimtsü atema temeden aser parnok tarutsü atema telemtetba agitsü atema nüngdakba angateta lir aser iba amala mapang ka nung Imjongwati

longkumer amala lanur ka nüburtem tenzüksü atema nokdakba ajanga lokti nung nüburtem aser talisa lanurtem mulung kokteta arudar.

Tanü asenok ajaki Naga nung yimden yimsüsüba yimya tajungba kuma melenshiner aser asenok pongmang ya asangsang kümdaktsütsü atema aser asenok ajaki aginüba tarutsü ka yanglutsü atema ana nung lir.

Election merekmereka ochishia agitsü atema onok nokdaker. Inyakyim tapet kübok onoki tarutsü tajungba ka yangertsü, ta kasa sangdong ajanga metetdaksü.

ABAM aser OKM nati Kukua aitsür

Dimapur, Tsüklai/February 23 (TYO): Nüji tia bener aruba Khrista Yimsü agizüker küm 150 ajungba lima ka nung Tsüngrem dak amangertemi kati ka taochi makai tepsettepa ya laishiba tesayuba anema lir. Koba kuli ajanga südir süang, taochi makai February 21, 2023, nung Chungtia senso ka tepsetba ya ABAM-i kukua aitsür. Aruya aliba Election dak sendakba nung alimai süngmangtsüsa aser Tsüngrem mepelatsüsa temenen mapatem inyakba nungi pila litettsüsa senso ajak nem tangatetba tindang agüjang ta ABAM sarasademer, ta Executive Secretary, ABAM Rev. Dr. Mar Pongener-i lemsatepogo.

Kasa mapang nung Ongpangkong Students'

Conference (OKM)-ia, Chungtia yimtsüng nungi Imkongchiba Kichu mejangjaba nisungtemi taochi makai tepsetba dak sendakba nung asükhu lemsatepogo.

OKM-isa, iba meimchir dak mebenschitsüba yimba benschiba aitsüogo aser ozüing amshirtem dak iba ken o kanga junga bushisüingdanga takaratiba nung aibelena alirtem putena temzüing ozüing kübok tapet temerenshi agütsütsü mepeshia metetdaksüogo.

Maneni OKM-i asür kinungertem den asükhu lemsatepba den parnok nem mangyim jashi koktetsü atema tashi agüjang ta sarasademtsüba, tir Limatongzuk Jamir aser General Secretary Sungkumjang Kichu nati külem sangdong ka ajanga lemsatepogo.



Football world cup indang ken ka mejemba kanga takok ngua sayaba sülen Oren Mozhui ano "Welcome to Nagaland" nüngja agütsür ken tasen ka sayaogo. "Welcome to Nagaland" ken ya Nagaland nung lenmang sadema lapoka alibatam aser inyakyim tajungtem indang lir, koba bendangertem nem Nagaland tali semdangdaksütsü nükjidong nung mejema atenba lir. Iba ken ya Bethesda Youth Welfare Centre nung sentong ka ayongzüka agiba mapang Bethesda youth welfare center Dimapur chief functionary Chinethung Humtsoe-i sayaja liasü.

Indian Army shimba yimya tasen amshitsü

Dimapur, Tsüklai/February 23 (TYO): Indian Army nung shimoktsü atema online entrance exam tem ya April 2023 nungi tenzüka küm shia alitsü, ta sangdong ka ajanga ashi.

Tatidang dak sendakba osangtem ya www.joinindianarmy.nic.in nung sangdongtsü.

Jangra aliba candidate temi portal amshia online registration maparen tembangtsüla. Online Common Entrance Exam (CEE) ya linük tesem ajungalen centre balala nung agitsü aser Online CEE nung ajemdaker shimba candidate tem recruitment rally ka ajanga physical test aser medical examination atema ajatsü, ta ashi.

Merit nung ajemdaker tatempangba shimtsü aser takok anguba candidate tem documents/certificate repringba sülen training agitsü atema shimtsü.

Aadhaar, educational

certificate amala atema candidate tem Digilocker nung register asütsüla aser Aadhaar den sendaktepa aliba mobile number aser email ID tejangja alitsüla, ta ashi.

Teyari nüngdaba candidate temi anasatiba Army Recruiting Office (ARO) den tongteprateptsüla. Registration, application aser Online CEE agütsütsü atea Join Indian Army website nung video balala inokja lir, anungji candidate temi recruitment atema application agütsüdang item video nungi teyari agitsü ayongzüker, ta sangdong ajanga ashi.

Recruitment Year 2023-24 atema candidate tem asoshi application atema registration window ya tarutsü nung lapoktsütsü. Application nung candidate ajungai kanga kumdanga details tem inoktsü ajungshir, kechiaser khen agütsüba sülen memelenshitetsü, ta ashi.



Delhi MCD senden nung rongrong adokba sülen anogo ka lir February 23, 2023 nü New Delhi nung Delhi Mayor, Shelly Oberoi den AAP lenirtem- Sanjay Singh, Saurabh Bhardwaj aser Atishi nungeri osangbenertem den jembidang tangokba noksa nung angur.

Biswa Bhusan Harichandan-i Chhattisgarh Angh tenangzükba agi

Raipur, February 23 (Agencies): Brihostibarnü Raipur nung aliba Raj Bhawan nung Biswa Bhusan Harichandan-i Chhattisgarh Angh tenangzükba agiogo.

Arrshi küm 89, Harichandan ya Andhra Pradesh nung Angh inyaka lia Chhattisgarh Angh menden atema shim aser Brihostibarnü Chhattisgarh High Court nung Chief Justice, Arup Kumar Goswami-i ketdangsüa Harichandan nem tenangzükba agidaksü.

Pai Anusuiya Uikey melenzüker; tawa Anusuiya

Manipur Angh shima liasü. Harichandan tenangzükba agiba sentong nungji Chhattisgarh Chief Minister Bhupesh Baghel, Assembly nung Opposition lenir, Narayan Chandel, state minister tem aser tongti ketdangsertem aika densema liasü.

Harichandan ya 1934 küm August 3 nü Odisha nung aso. Pa tebu Parshuram Harichandan ya kenshi oshir ka liasü. 1971 küm mezüng pa Jan Sangh nung dena yimtenren nung ajemok.

Pa Andhra Pradesh nunga

Jan Sangh General Secretary inyak aser Odisha nung pai BJP tentetba sülen nungi state nung party junga amenoka liasü.

2021 küm pai Kalinga Ratna award ngua liasü.

Odisha nungi Harichandan ya state nung ponguben tashi MLA shim aser pezüben tashi minister inyaka liasü. 1980 küm pai Odisha nung BJP tentet aser Tir inyaka liasü aser maneni kümsük asem tashi state nung BJP Tir inyak.

Pa küm 13 tashi Odisha Assembly nung BJP Legislature Party lenir liasü.

HC-i Morbi apu chirepdang asür shia nem sen lakh 10 agütsütsü tuyu

New Delhi, February 23 (Agencies): Gujarat High Court-i The Oreva Group dang, yaküm October ita nung Morbi apu chirepba lendong nung asür shia nem hopta pezü tsüngda sen lakh terer (lakh 10) aser iba lendong nung yirua alir shia nem sen lakh anana agüjang, ta tuyuogo.

Gujarat state kübok Morbi nung aliba apu mapang shia anepalua reprangba company ji Oreva Group lir; yaküm iba lendong nung nisung 135 asü.

Iba ken o angadanga mapang nung lendong nung takoksa angurtem tenüng nung jembitsür Advocate KR Koshti-i, iba lendong nung kibong aika nung tebok mesütsü atema mapang inyakerem süogo, ibayongji kinüngtsür aser tanur aika timtemdar, ta metetdaksü.

Mongolbarnü Ajanta

Manufacturing Ltd (Oreva Group)-i iba lendong nung asür kibong shia nem sen lakh pongungu aser yirur shia nem sen lakh kaka agütsütsü asüngdanga liasü, ajisüaka Chief Justice Sonia Gokani-i, iba jagi meperitsü, ta ashi.

Iba lendong atalokba sülen iba tatalokba bushisüngdangtsü atema Gujarat sorkari special investigation team (SIT) ka tenteta liasü.

SIT-i, Morbi nung inzü agi tepdanga yangluba apu chirepbaji inzü tasadang shi song agi chir liasü aser suspenders inzüji tejen o tasen na külemi 'welding' asüba agi liasü, ta metetdaksü.

SIT Report ajanga, "Inzü 49 nungjagi inzü 22 bo kanga mejungi liasü, aser ibaji ajanga lendong matalokdang item inzüji petdang asütsüa akok ta

kuli sayur. Tanüngba inzü 27 jia tawa raksaogo," ta metetdaksü.

Iba ken o dak sendakba nung Police-i Oreva Group MD, Jaysukh Patel densema nisung ter apu.

Morbi nung Machchhu ayong tepdanga yangluba apu ya küm 100 tejaklen yangluba lir. Ita tenet tashi iba apu yanglushiba sülen tanaban lapoktsür anogo ishika tsüngda apu chirep.

Iba apu ya lenden nung tasazük metre 1.25 aser metong nung metre 233 liasü.

Iba anogo nungji lanur kari iba apu anokshia liasü. Raliwalirtem tsübudaktsütsü atema lanur kari apu mesangba lisü nungji metsüloktsü aser anokshitsü, aser iba video ji social media nung kanga prokshia liasü.

India aser China nati senden mena LAC tensa asadangogo

New Delhi, February 23 (Agencies): India aser China nati maneni senden mena Line of Actual Control (LAC) nung tensa asadangogo, ta ketdangsertemi metetdaksü.

Arrtsülen tanüngba tesemtem nungi sepaitem aienshitsu atema telemtetba magitet saka 2019 küm sülenbo tang mezüng lenirtem tsüngdong ajurua senden menogo.

MEA joint secretary (East Asia) leniba nung teshimtet telok ka China yimtiba, Beijing-i oa iba senden nungji shilem agia denogo.

Sorkari sangdong ka ajanga, "Linük anati India-China arrtsülen anüolen sector nung aliba LAC nung tensa asadangogo aser tanüngba tesemtem nungia sepaitem aienshitsu atema o lemtepogo, kechiyong ibaji ajanga dang anüolen sector LAC nung tesünep alitsü aser linük ana tsüngda tesendaktep tajungba akümtsü atema lenmang lapoktsütsü," ta metetdaksü.

Item nükjidong ataloktsü atema tang linük ana tsüngda tezüngzüktep agia alibatem aser inyakyim den külemi linük anati tekaraba nung 18buba senior commanders senden amentsü melungtepogo, ta sangdong

nung shia lir. China-ia sangdong ka ajanga, arrtsülen linük anaprongla nungi sepaitem Galwan Valley den tesem pezü nungi aienshitsu bangjemba ama inyakba jenjang asadangogo aser onük pezü nung telemtetba agia liasü, ta metetdaksü.

Mezüngbuba nung, arrtsülen tensa maneni süngjemtsü atema linük anaprongla nungi lenirtemi lemteba ama mapa küma inyaktsüji tongtibang, ta bangjem.

Tanabuba nung, linük anati tezüngzüktep agia aliba ama shidak beshitsü, aibelen tanaben mebeshitsü aser arrtsülen yimjung alitsü atema inyaktsü bangjem.

"Tasembuba nung, tamalen melungtepba ama linük anati lenji oa inyaktsü, China-India arrtsülen anüolen sector nung mangatettep ken otem tekaraba nung bentetsü atema inyaktsü, tekaraba nung linük anapronglai melungtepa telemtetba agitsü aser arrtsülen tensa süngjemtsü atema mera agia inyaktsü bangjem. Pezübuba nung, linük anapronglai maneni amalitepa inyaktsü aser tekaraba nung 18buba military commander-level senden mena ken o jembitsü melungtepogo," ta China-i metetdaksü.



February 23, 2023 nü Madurai nung lokti kiyimba sentong ka nung AIADMK General Secretary, Edappadi Palanisamy adenba noksa nung angur.

PM Modi anema jembiba ken o nung SC-i Khera nem bail agütsü

New Delhi, February 23, (Agencies): Congress lenir, Pawan Khera-i Ato kilonser, Narendra Modi anema jembiba ken o nung Supreme Court-i February 28 tashi pa nem bail agütsüogo.

Congress lenirtemi ashiba agi, Delhi airport nung Assam police-i Khera pua liasü.

Congress plenary senden nung adentsü atema Khera Raipur-i aotsü lia Assam police-i mepishiba nung ajemdaker Delhi Police-i pa apu, ta Delhi Police ketdangser kati metetdaksü.

Brihostibarnü Rajya Sabha MP aser advocate Abhishek Manu Singhvi-i Supreme Court dang, Congress lenir anema benoka aliba FIR ajakji ka dang akümtsü mepishi. Khera anema Assam, Lucknow aser Varanasi nung ken o benoka lir.

Ajioda Supreme Court-i Assam aser Uttar Pradesh sorkar na dang Khera anema benoka aliba FIR ajakji ka dang akümtsü dak sendakba nung telangzüba meshiogo.

Adani Group ochimashi ken o dak sendakba nung Mumbai nung osangbenertem den jembidang Khera-i, Ato kilonser ya "Narendra Gautamdas Modi" lir, ta shia Centre sorkar aitsüba sülen Assam kübok Haflong police station aser Uttar Pradesh kübok yimti ana nung pa anema ken o benoka liasü.

Mongolbarnü Delhi BJP-i New Delhi nung Congress lenir, Sonia Gandhi'er ki anasa adenshir longkak aita All India Congress Committee otongdar, Pawan Khera-i jembiba o atema tatok meshiang ta takhangba agüja liasü.



February 23, 2023 nü Anantnag district nung lokti senden ka nung Democratic Azad Party Tir, Ghulam Nabi Azad aser party lenirtem tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI (FEBRUARY) 24, 2022

Sen masü sen angutsüba tasa

Sen agi ajak angur amai bilemer, iba jagi asenoki tenük amur sen bushir. Aji oda, tenük amur bushir asünungji asenoki shinga mangur aser shinga danga maker. Aji dang masü, tenük amuba agi tanü adokba anüa mangur aser asüng adoktsüba anogo indanga mebiledanger. Tenük amur meshir aser tenük amur ayur aser tenük amur endoker, anungji tenük saker reprangdangdangbo kecha makar. Ibaji nükpokeri tangar dang meshir pa juli tapok nung enok amai lir. Aji oda, asenok nübortema bilemdangdi süra, taoba election nung asen vote yoka achiba sen to agi kechi inyak aser kechi aküm? Ano külen candidate-tema akümlü piyong shitak meshitak memetet tenük amur bendena rongsen to kechii ao aser kechi aküm? Sen agi asenok taküm alitsü asübo amtsük agiang taküm lila. Ajsüaka, amtsük agia asenok taküm alitsü makoka ta Yisui moijing dang ashiba o to asenok akümlirtem atema tangazüksü tongtibang mapa ka lir. Taküm jungjunga alitsüba ya, atangji sen agia masü aser chiyongtsü agia masü, ochi aser meranga inyakba agi alir. Sen aser amtsük kisüng agi taküm alitsü asübo tenük amur sen bendena akarterm toang sensaker mekümla aser timtema melila. Sen kisüng agi taküm alitsü asübo sen sen dang penbua bendenertembo kodanga mesüi tang tashi taküm lila. Aji oda, sen agi taküm yanglur masü taküm agidang sen yanglutsü, kechiyong asenok ya sen atema taküm alir masü saka taküm nungdak kar alitsü atema dang sen nungdaker. Itemji kodang bilemdangdir, tang ama election agiba ya pei pei constituency nungi yimsüsür shimteta government akümstü asoshi agir aser iba government jagi asenok nübortem tanü nungdak asoshi dang masü saka tarutsü anogotem asoshia bilema ozüng latettsü, sentong yanglutsü aser itemji mapa küma inyaktsüsa ketdang asütsü. Aji oda, kodang asenoki election agiba aser government akümba nükjidong ya angatetdir, candidate-i asenok dang vote melen sen agiang ta ashiyonga, asenoki sen masü ozü chirnur aser semchirsemnurtem angati kaketshiatsü tajung angutsüsa school aser college-ang tajung lapokjang ta ashitsü. Kasaji, asenok dang candidate-temi sen lakh agi asen kibong ajunga indang vote alidi ta asüngdangyonga, asenoki sen masü onok timtem aser menemshilu dang yakta sen meindoki taneptsü angutsüsa onok alidak government mozü kiang tajung ka lapokjang ta ashitsü. Aji oda, candidate-temi election mapang asenok sen agi mesüzüksü merangyonga asenoki parnok dang lanurtem light tashi amshia mapa inyaktsüsa electric light-ang anogo shia kena mesepdaksüi shitak yokang ta ashitsü. Kasaji, candidate-temi vote melen sen agütsüyonga, asenoki sen masü onok nungdak nung gari aser temang meraksai jet jet ta oli aruli jajatetsüsa highway dang masü saka alu lenmang dena yanglujang ta ashitsü. Aji oda, kodang asenoki election agiba ajanga government akümba nükjidong angatetdir, asenoki tang election mapang sen tera agi vote ayoktsübaji masü saka candidate-tem dang election sülena teti taküm nungdak peria senotsü angutsüsa mapa inyakdak tesem aser lenmang lapokjang ta akangtsü. Election mapang yabo, asenoki angatetsüba kaji, candidate-i sen kwi agütsüdir agüjang ibaji tangari asen nem khen soa achitsü atema aonsutsü ka agütsür amai lir, anungji aji khen soa chiyongerbo tanaben asotsübo makatsü. Ajsüaka, China nunger shin o nung ashi ama, asenok asoshi angu masü saka angu aputsü tasa (idea aser skill) nungdaker. Tetezü asenok asoshi sen masü sen angutsüba lenmang aser mapa nungdaker. Iba tangatetba nung nübortemi candidate dang "tang onok nem sen masü saka election temer külen teti sen angutsüba lenmang lapokjang aser tasa agüjang," ta ashitsüla.

OLEMSABANG

CLEAN ELECTION NUNG TAMANGER KA SHILEM

- Dr. R. Zulu Jamir, Kumlong Baptist Arogo

(Yashi adok nungi...)

Item dang alia ano tanga nungdaktem aika lir. Item mangdangtem mapa küma inyaka aotsü asoshi ketdangsür shimtetsü ne senti voteji ajak dang tongtibang. Nai ne senti vote shiba nem agütsütsü ajibo ne temeden, saka Khristan tajung ka ama nai alima yanglutsü asoshi koba tangatetba election nung shilem agir! Ya ajak dang tongtibangtiba. Tanü asen lima tenük telen balala manemi shiranga lir. Iba shirang yabo pi bendanger arua aneptsütsü makok, saka iba shirang aneptsü mozü yabo asenok ket nung lir. Anati dang melenshitsü asoshi asen temeden vote ochiba lenir nem agütsüra, asen limaji melenshia adoktsü. 1 Chubatem 10:9, Chubatsür Shebai Soloman dang yamai ashi, '...Anungji obendangtsü aser ochi inyaktsü na chuba kümdaktsü.' Naga nunger lenir shiai ya angatetdaksür; nübortem rongnung ochi pangdak yimsü asütsü Tsüngremi na shimetet süra, naia Tsüngrem tsüngdang nübortem ochi shia anitsü koba tenangzükba ayur? Tanü Naga nunger asoshi yimden yimli yanglutsü tongtibangtiba asü, mesüra political party tongtibangtiba? Lenir shiai tashi aser party masü saka nübortem shimtsüla. Khristan lenir ajaki Khristan principle tejangja nung taküm aser nükjidong ajunga amendaker yimsüsüba menden asoshi nokdaktsüla.

Clean Election Nükjidong ataloktsü asoshi amangbapur shia teinyaktsü:

1) Lenir ka shimtsüji ne temeden: Anitet 18:21, nung yamai ashir, 'Iba dak alaka nübortem nungi Tsüngrem tsübuba, süpokrem sembaba, ochishir nisungtem aser mapa akoktsüba pur rongnungi meyrjang, noklang, tenem aser ter madak yimsüsütsü shima yuang.' Tanü asen tendak lenir ka shimtetsü temedenji nübortem lir. Asenoki shimba lenir ka dakji alima yanglutsü mesüra raksatsü tashi lir. Anungji temelenshi aginüra Naga nunger senso shiai pi senti voteji sarasadema atar Tsüngrem metetba aser ochishir ka nem agütsütsüla. Tanü asen Naga lima ochishir, nübortem meimba, alima tejakleni anitsü mangdang akaba aser Tsüngrem meimba lenir nungdaka lir. Item lenir shimtsü asoshi temedenji nübortem dak tashi lir. Tanü asenoki lenir tajung shimtetra, temeleshi bener aruba rongnung tongti shilem agirtemji asenok asütsü.

2) Mamangertem den süngra kasa Teputep: Alima nung sobaliba aser tamangba yimsü aika lir. Item pur ajak den yaritepba kati ka meima lemsateptsü nungdaker. Saka item sobaliba aser tamangba yimsü dak amendakba libaliro nem asen tamangba yimsü atsünga arudaktsütsüsa malitsüla. Daniel 1:8, nung Danieli yamai ashi, 'Saka Danieli pei mulung nung chubar chiyongtsü tajung mesüra pai yi ajemba agi pa sasa pa memenentsü ta mulungtet.' Babylon chuba Nebuchadnezzar ozüng tesashi anema Danieli bendanger tsüngrem külemba chuba den süngra kasa nung maputeptsü mulungtet. Tanü asen Naga nunger taküm aliba Tsüngrem chir Yisu Khrista dak amanger süra, pi tamangba yimsü dak amendaker yangluba party ka nem naga nunger yimden yimli den asen tamangba jenjang aser temeden mayoktsüla. 2 Korinth 6:14 nung ashir, 'Mamangertem den süngra kasa nung teputep. Kechiyong temeshibaji temenen den kechi nung puteptet? Tesangwaji amang den kechi nung puteptet?' Election mechi nung asen tesangwa yimli tammang nem moksepdaktsüra, asen Naga nunger aiatai!

3) Tsüngrem chir temeden Wazüka Yuang: 1872 küm Dr. E. W. Clark ajanga Yisu Khrista Osangtajung bener aruba ajanga Naga nunger tesangwa yimli aser nujii dangi anitet. Samaa aotsüba jenjang makaba nungi Khrista ajanga tatem maka yimli senmang amangtsüsa maongka ya kecha dena medemdangtsü makok. Yisu Khristai sayuba yimli yabo kecha political party mesüra yimsü yimpong den külemi alenteper aotsü makok; iba lima nung akaba rongsen, ain, tashi, yimli aser temetetba kecha dena Khrista nungi anguba senmang yabo medemdangtsü makok. Tsüngremi Israel nübortem dang ashi, 'Nai kü madang tangar Tsüngremtem kecha telidaktsü' Anitet 20:3. Tanü Hindu nungeri

külemba tsüngremji dang süngyanglu masü, saka kodang asenoki election, rongsen, achi ajembatem asen taküm nung tongtibangtiba kümdaktsüra, asenokia süngyanglu shimteter akümer. Iba tai telemtetba agiba nung tesama tulu ajurutsü menua mali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Abu Dhabi nung Abrahamic Family House semzükogo



UAE yimtiba, Abu Dhabi kubok Saadiyat Island nung Abrahamic Family House noksa nung angur. Abelen noksa nung mosque, tiyong nung Tenla ki aser ajichilem synagogue noksa nung angur.

Abu Dhabi, February 23, 2023 (Agencies): United Arab Emirates (UAE) yimtiba, Abu Dhabi nung February 16-19 anogotem nung Abrahamic Family House nung tekülem ki asem semzükogo; iba centre nung Tenla ki ka, synagogue ka aser mosque ka lir.

2019 kum February ita nung Abu Dhabi nung Pope Francis aser Grand Imam Ahmed el-Tayeb nati Document on Human Fraternity sangdonga sign asüba dak sendakba nung iba center yanglua renemogo.

Abrahamic Family House (AFH) ya March 1 nungi tenzuka nüburttem atema lapoktsütsü aser raliwalirtemi iba center semdanga tekülem agitetsü akok.

Yimsü lenir ana tsüngda senden amenba mapang nung telemtetba agiba sülen 2019 kum August ita nung Abu Dhabi Crown Prince, Sheikh Mohamed bin Zayed Al Nahayn-i iba center amenoktsü atema Saadiyat Island nung kimong agüja liasü.

Laishiba nung Abraham ya Islam yimsü, Khristan yimsü aser Yihuda nung yimsü amangertemi kanga tushia akhümtsübur, aser Abraham nungtem nung iba centre dang Abrahamic Family House ta aja. Iba center ya February 16 nungi tenzuka semzük aser tatamsa February 19 nü St. Francis Arogo Tenla ki semzuka iba sentong tembanga liasü.

Tamalen Pope Francis atema personal secretary inyaksang aser Catholic Coptic putir, Yoannis Lahzi Gaid-i, "Iba center semzükba ya Human Fraternity sign asüba indang mezüngbuba süngjang lir," ta metetdaksü.

Yoannis ya Abu Dhabi declaration atema tentetba Higher Committee of Human Fraternity nunga züngsem liasü.

Osangbener den jembidang pai, "Iba center semzükba ajanga yimsü balala amangertem atema tarutsü tia tajungba akümtsü asoshi teimla agütsür," ta metetdaksü.

Centre nung yangluba Tenla

ki ya Catholic Arogo indang süaka Khristan denomination ajak nungi tamangertemi iba Tenla kidang tekülem agitetsü.

Iba centre nungsa Imam el-Tayeb mosque aser Moses Ben Maimon synagogue lir; tesüiba kum 100 tsüngda tang mezüng Gulf nung synagogue yanglubaji ibai lir.

Lahzi Gaid-isa, "Tamangba yimsü aser politics naji mapang ajak nung bendangtsü nungdak; nütsüng aser linüktem bendangtsü nungdak," ta ashi.

Muslim yimsü amanger nütsüng teimba aliba region ka nung synagogue yangluba dak sendakba nung pai iba o ya jembi.

St. Francis Arogo ya Apostolic Vicariate of South Arabia kubok lir aser anogo shia tamangertem tenzüksü aser iba Arogo achaayangtsü atema ano putir ka-ana tali lemzüksütsü.

Paisa, tesem ka nung tamangba yimsü balala asem indang tekülem aliba ngua pai Tsüngrem nem tenüngsang agütsür, kechiyong Human Fraternity declaration atema Kibubai yaria liasü, ta metetdaksü.

"Tesem ka nung dang yimsü balala asem amangertem anguba aser kati ka akhümtsübutepba ngua kanga pelar," ta pai shisem.

Kobi melii Abu Dhabi nung Hindu nung tekülem ki kata yanglutsü sentong lir.

Tang iba linük ya Muslim linük ka süaka iba linük nung Khristantem aser bendanger Khristantema lir aser tesüiba kum 20 tsüngda archaeologist temi Islam yimsü malidang aliba Khristan monastery-a ana ngutetogo. Iba linük nung bendanglen nungi aruba Yihuda nungertema lir, aser kum ishika tejaklen ang iba linük nung 1507-1650 mapang nung aliba Yihuda nung indang "David son of Moses" leper lung ngutetogo.

Conference tetenzük sentong nung jembidang Interreligious affairs of the American Jewish Committee

international director, Rabbi David Rosen-i, Abrahamic Family House ya Abraham nungi jakzükba yimsü asem akhümket lir, ta ashi.

Kasa sentong nung jembidang Dicastery for Interreligious Dialogue nung prefect, Cardinal Miguel Ángel Ayuso Guixot-i, iba center ya yimsü asem tsüngda tangatetep adokdaksüba milen ka südaktsüsüla, ta ashi.

Meimchir temeden atema inyakba telok balalai, UAE-i democracy aser meimchir temeden anema inyaker ta aija arudar, ajisüaka tesüiba kum ishika nung UAE-i region nung yimsü balala tsüngda taremsüktep aliba jenjang ajungkettsüsü atema inyaka arudar.

China linük nunga Arogotemi 'World Day of Prayer' amongtsü



2019 kum March 1 nü Shanghai Gospel Church nung World Day of Prayer amongdang tetsürtemi ken ka atenba noksa nung angur.

February 23, 2023: Taruba Hokolbarnü (March 3, 2023) tamangertemi "Reconciled in Christ" omen nung ajemdaker World Day of Prayer amongtsü; China nunga Arogotemi iba anogomong sentong ayongzuka agitsü.

CCC&TSPM kubok Women & Youth Ministry Committee-i sangdong ka ajanga, takumbo official sangdong nung aliba sentong ama masü saka committee-i dang iba sentong renemtsü, ta metetdaksü.

World Day of Prayer (WDP) official website nung shia aliba agi, takum iba sentong ya World Day of Prayer Committee of Taiwan-i Efesa 1:15-19 Lai nungi "Ni nenok tamang indang angashiogo" omen nung ajemdaker agitsü.

Takum agi kum anabuba

ANOGO ABEN TSÜNGREM DEN

Kechiba tendanger ?

T. Ken 66;8-20

Iba ken ya tasü meiti alirtem asoshi lir. "Kintemi Tsüngrem moajang, aser Pa nüngsangba ola angashidakjang" (t.8) Kechiba ? "Pai asen takum sotta lir. " Kechiaser Pa dak asenok alir, arakzür, aser takum alir; nenok pei ken mejemer kari ashi ama" (t.m. 17:28). Anungji asenoki Pa tenung sangdi.

"Kechiaser, o Tsüngrem nai onok atitangogo. Taribi tendangba ama nai onok tendangogo" (t.10). Tsüngremi asen tendangbaji asenok kuli asütsü atema/metettsü atema tentanger. Pai Pa atema kecha kuli masür. Pai asenok telung tema ajak metetta lir. Pai asenok nungi langka kuli bushir. Tsüngremi asenok silver ama jenjang keta züngshir, aser ibaji tentangtsü asoshi tia ka nung yutsür aser iba jagi asenok tashi itshidaktsür.

Iba indang tanabuba tekong ana nungji reprangang. "Nai onok sang nung inok; Nai onok teperem nung khu taret benloktsü. Onok kolak manung nai nisung süngdaksür; onoki mi aser tzü ajanga ao; saka nai onok takar linük kati aniok" (t.11,12). Iba yagi tamakok sayur. Onok mi aser tzü ajanga ao, saka onok takar linük kati anir aru. Takar tetezü "talubusa tetezü tzü aser süngjang lijang teperi alidak." Yihuda arem kong David aiben Pa kija liasü aji takong lima liasü.

Ken züluri Pa tanaben iba mita jagi anir aru ta mashir. Pai ashir, "Tsüngremi anir aru, aser ibaji ajanga Tsüngrem kü den aor. Aser kodang Pai ni anitet, ni takar linük ka nung alitsü." Kodang asenok timtem ajanga aor Tsüngremi teti asenok takar kümdaksür. Asenok Yisu mesük kümdaksü Pai tentanger aser kuli asür.

Tsüngremi tentangbaji merüktettsü aser tashi asoshi lir. Iba jagi asenok Yisu mesük kümdaksür. Tetentangba ajanga na tanü tasü meiti lir asü ? Tasü itang Tsüngremi na angur aser ne tetentangbaji Pai na yanglutsü asoshi amshitsü.

Tekülem sentong nung China tsür Khristan aseme pei takum kuli lemsateptsü; Harbin, Heilongjiang nung aliba Nangang Dazhi Street Arogo nungi Rev. Li Meilan, Guizhou nung aliba Duyun Arogo nungi Rev. Lin Li aser Yangpu District, Shanghai nung aliba Hudong Arogo nungi Wang Jianhua nungeri takum kuli lemsateptsü.

Pastor Li aser Pastor Lin nati mezüngbuba National Religious Advanced Individuals Award ngua lir aser Arogo nung lenir Wang-ia 2022 kum mezüngbuba Shanghai Charity Award sentong nung Charity Model Award ngua liasü.

"Women's World Day of Prayer" ya mezüng Canada aser US na nungi Khristan tsürtemi ayongzuka agia liasü. 1964 kum tentetba World Day of Prayer International Committee-i World Day of Prayer anogomong ya kum shia Hokolbarnü ayongzuka agir.

Kum shia iba anogomong nung Khristan tsürtemi linük nung azükaru alitsü, nüburttem tang anema tepela nung alitsü, alima nung yimchi-yimjung alitsü aser nüburttem tsüngda tesünep nung alitsü atema sarasademer.

China nung TSPM Arogoi pei sasep nung World Day of Prayer sentong yanglua agitsü. Yakum WDP omenji "Melungsoa Tenlatsüla" liasü.

CCC&TSPM-i sangdong ka ajanga, "China nung Arogo tensa den apet yakum nungi Women & Youth Ministry Committee of CCC&TSPM-i dang sentong ayongzuka tekülem agir. China tsür Khristantemi pei takum kuli lemsateptsü, Lai nung ajemdaker agitetba omen nung bible study asütsü aser tangar atema sarasademtsüsü," ta metetdaksü.

Parnokisa pei lima tanaben longjemtsü, China renloktsü, climate change, alima nung tzümpung kumzüksü aser coronavirus wara sülen Arogo asüngsashitsü atema sarasademtsü.

AO OSHI ANGAZÜKDAK:

TANÜ ANGAZÜKTSÜBA OJANG



Ozúsangnu

(n) ozü tapu ajak (birds family)

* Arem nung ozúsangnu mesamadaktsüsüla.

Ozüsen

(n) ozü tasen poktetba (new variety of bird)

* Arem tulu lira, aji bushia ozüsen arutsü.

OLONG PAITEP # 6438

Grid for OLONG PAITEP # 6438 with numbers 1-24 in a crossword pattern.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nüsü tebuba - (3)
5. Anügdang tesangwa - (3)
6. Apitet - (5)
7. Yagi jungdaktsür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6437 TELANGZÜBA

TIPIEN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



ALOKBA O SOBANGBA NA SHISA BULUR :

Alokba : Temba, ni Kanga shisabulura no.
Sobangba : Waa, tang ama election mapang nung anogo nung asemben akshi akshi den chiyunga, temanglemtsü pei jemshijema, carrom kaa kazürang anogoshi hajera sen noklang pungu-ngu süoker ki bushiba facility yur kechi shisa bulur, hü?
Alokba : Aji ashirba ato-- "ito koato" ta ahabato. 27 February sülenjibo asenok kazüdak camp yaa malitsü, longkor toa lokadoktsü, carrom masayatsü, joko azümasen tenteter hajera-a mounütsü, pasa mechiyungnütüsü--- iba jagi shisa bulurba atiiiii.

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



Arunachal nung ENNG pur tesep ka putetogo



Arunachal Pradesh police-i telungpur telok ENNG indang tesep ka ngutetba sülen rongdoktsüba noksa nung angur.

Itanagar, Tsüklai/February 23 (Agencies): Arunachal Pradesh police-i Brehostibarnü India aser Myanmar arrtsü nung counter-insurgency operation ka ayongzüka agiba mapang Naga nunger telungpur telok, ENNG indang tesep ka Arunachal Pradesh kübok Changlang district nung potetogo.

Sepaitemi ENNG tesep nung prangbong injang aika ngutetogo, koba Arunachal Pradesh police temi raksaja liasü.

Osang tejanga ka angazükba sülen Arunachal Pradesh police indang special task force (STF) team ka aser Changlang police-i Brehostibar anepdang Arunachal Pradesh nung Changlang district kübok

Myanmar arrtsü nung Lungpang tesem nung amenoka aliba Eastern Naga National Government (ENNG) indang tesep ka meita oa liasü.

"ENNG pur inyakyim ya Arunachal Pradesh police-i ita ishika meita aruogo. Parnoki state security amokmerenba telangzüba agütsütsü asoshi telangzüba tapet agütsütsü atema tasa ka asa liasü," ta Arunachal Pradesh police ketdangsür tejan kati ashi.

Bodhbarnü meita aoba mapang telungpur pongu senzüsenpongba lazüka liasü.

Brehostibarnü meita aoba mapang iba camp ya sentong tapet yanglur amak. Ibayongji telungpurtem ya parnok tesep toktsür jena aotsüsa kümadak,

ta Arunachal Pradesh police ketdangsür yagisa metetdaksü.

Meita aoba sentong tembangba sülen iba tesep nung kuli bushiba mapang prangbong aser injang aika ngutetogo.

Sepiatem ngutetba prangbong injangtem rongnung AK-47 rifle ka, M16 rifle ka, hand grenade ka, AK-47 indang 7.62mm injang (104 nos), 5.56mm indang injang (23nos), AK-47 indang 7.62mm ammo magazines (4 nos), 5.56mm ammo magazines (2 nos), nok ana, WT communication set along ka den charger aser Anthony Taidong tenüng nung PAN card ka densema liasü.

Inyakyim ajak tembanga inyakba sülen iba tesep ya rongtokja liasü.

PM Narendra Modi-i Shillong rally nung shilem agitsü

Shillong, Tsüklai/February 23 (Agencies): Meghalaya nung election agitsü atema anogo ishika dang lia nübuyimba sentong kanga tongtibangsa agi tenzüko.

Meghalaya nung party aser candidate temi state nung voter tematsüa arutsü atema kanga meranga inyaktepdar.

Taküm Meghalaya assembly election nung BJP pura constituency 60 prongla nungi tokteptsü atema candidate tem shimogo aser party pusemdaktsütsü atema nüburtem atsüa arutsü asoshi takokba tashi inyaktepdar.

Taküm state assembly election akoktsü atema

Meghalaya nung ochi mashi inyakyim maliba sorkar ka amenoktsü tenangzüka agüja BJP puri nübuyimdar.

Meghalaya legislative assembly nung züngsem 60 atema election February 27 nü agitsü aliba mapang ka nung parnoki state nung nüboyimba sentong atema parnok indang star campaigner PM Narendra Modi anir arutsü atema telemtetba agiogo.

PM Narendra Modi-i February 24 nü Shillong nung BJP party indang rally ka nung shilem agitsü.

PM Modi-isa, Meghalaya nung BJP candidate 60 pusemertem tali anidentsü

atema Shillong kidanger Khyndailad nunga voter tem den jembitsü.

Iba ya Meghalaya nung PM Narendra Modi atema mezüngbuba road show asütsü.

"Ni Police Bazar (in Shillong, Meghalaya) nung February 24 roadshow nung arua shilem agitsü atema nüburtem ayongzüker,' ta Meghalaya BJP tekolakba Ernest Mawrie-i ashi.

Taoba mapang Meghalaya BJP-i, NPP-i aniba MDA sorkari West Garo Hills district kübok Tura jila nung PASangma stadium nung PM Modi indang election rally ayongzüka agitsü atema temelaba magütsü liasü, ta ashi.

Manipur: Kuki nunger telungpurtem den Ceasefire atsülangshi

Imphal, Tsüklai/February 23 (Agencies): Centre aser Kuki nunger telungpurtem tsüngda Suspension of Operations (SoO) tenangzüktepba yanglur aliba taküm February 28 nü tembangtsü liasü, ajisüaka iba tenangzüktepba ya küm ka agi atsülangogo.

Centre aser Manipur sorkar-i, Kuki nunger telungpur telok ana; United People's Front (UPF) aser Kuki National Organisation (KNO) den tripartite SoO tenangzüktepba ya ano küm ka agi atsülangogo, ta official source kati Brehostibarnü metetdaksü.

KNO aser UPF na kübok Kuki nunger telungpur telok 25 dak temai iba SoO tenangzüktepba nung sign

süa lir.

Ceasefire atema tenangzüktepba ya 2008 küm mezüng yanglu aser mapangshia atsülangshia arudar.

February 17 nü telok ajak senden ka amenba sülen ceasefire atsülangtsü atema tenangzüktepba agiogo, koba March 1, 2023 nungi benoka inyaksangshitsü, ta source-isa metetdaksü.

Official osang ka ajanga ashiba agi, iba tenangzüktepba nung sorkar tenüng nungi Ministry of Home Affairs (NE) additional secretary Piyush Goyal aser Government of Manipur representative (resident commissioner) Devesh Deval aser UPF tenüng nungi Ketheos Zomi


as er Joshua Thadou na aser KNO tenüng nungi Dr. Seilen Haokip-i sign süogo.

Kuki nunger telungpurtemi taoba mapang Manipur nung Kuki nunger atema state balaka meshia liasü, ajisüaka tangbo (Kuki) territorial council ka meshir aser iba ken o dak sendakba nung sensaksem tenzüko.

KNO kübok telungpur telok 17 aser UPF kübok 8 lir aser item teloktem nungi züngsemtem tang state sorkari amenoktsüba camp balala nung lidar.

Temetetsükaji taoba sorkari 2022 küm March ita 7 nü parnok den tenangzüktepba yanglushi koba February 28 nü tashi benoka inyaksangshitsü.

Mary Kom-i aniba Oversight Committee nem hopta ana apuloktsü



New Delhi, Tsüklai/February 23 (Agencies): WFI tir Brij Bhushan Sharan Singh nema sexual harassment ken o benoka aliba dak sendakba nung osang agütsütsü atema Brehostibarnü MC Mary Kom-i aniba Oversight Committee nem hopta ana talila apuloktsüogo.

Sports Ministry-i osang agütsütsü atema committee nem mapang atakzükja aliba atsülangtsüogo. Iba committee ya linük nung temaba jenjang nung asayaba wrestler temi Brij Bhushan anema kon o benokba bushisüngdangtsü atema January 23 nü tenteta liasü.

Iba committee dang parnok indang report hopta pezü

tsüngda agütsütsü tetuyuba agüja liasü.

Wrestler temi ashiba agi, WFI tir-i tetsür wrestler tem aika dak mebenshitsü yimya benshiogo aser asayartem amokmerena liasü.

Ajisüaka parnoki asayartem tenüng mesangdongi liasü.

Iba committee nung Mary Kom den külemi taoba mapang wrestler Yogeshwar Dutt, taoba shuttler Trupti Murgunde, SAI züngsem Radhica Sreeman aser Rajesh Rajagopalan, ex-CEO, Target Olympic Podium Scheme aser CWG gold medallist Babita Phogat nung densema lir.

Committee züngsemtemi

mepeshiba sülen ministry-i atakzükja aliba mapang atsülangtsüogo aser tang iba report ya March 9 nü benoktsü.

"Sports Ministry-i report benoktsü atema Oversight Committee nem parnoki mepeshiba ama hopta ana atsülangtsüogo," ta ministry source kati PTI dang ashi.

Bajrang Punia, Vinesh Phogat, Ravi Dahiya aser Sakshi Malik nung densema wrestler temi New Delhi kübok Jantar Mantar nung Brij Bhushan tir mapa nungi agintsü aser WFI loksatsü khanga longkak aitba sülen ministry-i iba panel tentetsütsüsa aküm.

BJP MP dang bushisüngdang metembang tashi mapa nungi atsüngina atatsü tetuyuba agütsüogo.

Committee tentetba sülen India nung tongtibang wrestler temi Zagreb aser Alexandria nung UWW Ranking Series events nung shilem magitsü telemtetba agia liasü.

UWW-i India ket nungi Asian Championship ayongzüka asayatsü atema temeden aginogo. Tongtibang wrestler temi ashishiba sülen iba jenjang agi, ta UWW-i ashi.

Maxwell aser Marsh na Australia team nung züngoksemogo

Tsüklai/February 23, 2023 (Agencies): All-rounders Glenn Maxwell aser Mitchell Marsh na India nung white-ball asayamung atema Australia indang ODI squad nung züngoksemogo.

Maxwell tetsüng raksa-a surgery agi aser Marsh-a tetsüng tabelen teloktep operation agiba sülen taneptsü ngua tang team nung züngoksemogo.

India nung taküm 50-over World Cup asayatsü asoshi renemshiba mapang linük ana tsüngda Mumbai Visakhapatnam aser Chennai nung March 17 nü nungi tenzüka ODI asaya asem asayatsü.

Opener David Warner, shiba iba hopta concussion aser

tekatsüla raksaba ajanga India den Test asaya nung masayatetsüsa aküm, pa-a ODI squad nung züngoksemogo.

Ajisüaka pace bowler Josh Hazlewood-bo team nung mezüngoksem, shiba tetsüng yirua kidangi meyipaogo.

Kasa mapang nung Jhye Richardson hamstring yirur aliba taneptsü anguba sülen team nung züngoksemogo.

"World Cup asayatsü ita tenet dang anunga aliba mapang onok renemshitsü atema India nung asayatsü aliba asayatem ya kanga tongtibang asütsü," ta selection committee mendenbuba George Bailey-i ashi.

"October nung asayamung

atema asayartem shimtsüba rongnung Glenn, Mitchell aser Jhye nung ya tongtibang asayartem lir.

"Josh-a iba asayamung nung shilem agitet nung kanga jungla saka küm tatemlen England den asayatsü aliba temulung dang yur iba jenjang agiogo, kong pa kanga tongtibang asayar ka asütsü," ta paisa shimsem.

Australia ODI squad: Pat Cummins (capt), Sean Abbott, Ashton Agar, Alex Carey, Cameron Green, Travis Head, Josh Inglis, Marnus Labuschagne, Mitchell Marsh, Glenn Maxwell, Jhye Richardson, Steve Smith, Mitchell Starc, Marcus Stoinis, David Warner, Adam Zampa.

Afghanistan-i Pakistan den tongtipang... (Tapak 7 nungi...)

Arütsü alema senzüba lenmang ya Brehostibarnü tanaben lapoktsü imlar, ta Pakistan Afghanistan Joint Chamber of Commerce and Industry director Ziaul Haq Sarhadi-i ashi.

Arütsü nung trucks meyirijang aika anendaka aliba ajanga anatsülen shishilempaba tsütsü takoksa ya sen billion aika jenjang alitsü, ta Sarhadi-i ashi.

"Linük ka ama asenoki asen export tanaben tenzüksü nüngdaker. Arütsü tekeratiba nung lapoktsü nüngdak. Ya shibangba ajanga sen billion aika akoksaogo," ta pai ashi.

Pakistan aser Afghanistan tsüngta arütsü ya kilometre 2,600 (mile 1,615) talang lir.

Islamabad-i Afghan migrant tem temang anepalutsü asoshi Pakistan telungi maitdaksüba mechi Torkham crossing ya

shibang, ta Taliban-i ashir.

Külen Taliban-i özüng alema lendong agütsüba Pakistan Taliban tem miima ayur, ta Pakistan-i aitsür.


Pakistan nung tawa azüdokshia nisung jenti takum samatsüba asoshi iba telok tenüng asener.

Pakistan Taliban ya Afghan Taliban den tangatetba kasa lir aser parnoki Pakistan sorkar den 2007 nungi rara arur.




DECLARATION

We the undersigned party of NDPP & BJP unit under Longsa Village unanimously resolved to support young and dynamic leader Shri. Imkongmar NDPP candidate, 25 Mongoya Assembly Constituency in spirit as per poll alliance.



Pongenmeren
President, BJP
Longsa Unit



Noklennungsang
Acting Presiden
NDPP Longsa Unit

Sunrisers Hyderabad captain asütsü Aiden Markram shimogo



semi-finals nung century ka yangluba densema iba asayamung nung run 336 yanglu aser wicket 11 agia liasü. SA nung all rounder yagi taoba küm IPL nunga kanga junga asayaogo. Iba asayamung nung pai run 381 yanglu. Iba asayamung nung pa indang average 47.63 aser strike-rate 139 liasü aser pai half century-ia asem yanglua liasü.

Tsüklai/February 23, 2023 (Agencies): IPL team tem rongnung Sunrisers Hyderabad (SRH) pur dang captain meshimi aliba tang parnoki taküm team len anitsü atema South Africa nung batsman Aiden Markram captain asütsü shimba sangdongogo.

Kaviya Maran meyong iba team yagi Aiden captain asütsü shimba osang Twitter ajanga lemsatapa liasü. "Mapang talangka nungi ata aliba tembangogo. #OrangeArmy-i captain Aiden Markram pelashishia agizüker," ta parnoki tweet asü.

Hyderabad nung amendaker aliba team yagi IPL 2023 auction nung taoba captain Kane Williamson meyipa magi. Markram mesüra taoba Punjab Kings captain Mayank Agarwal na rongnung ka captain asütsü shimtsü akok ta bilema liasü.

Arishi küm 28 tain Markram lenisüba nung Sun Group meyong Sunrisers Eastern Cape team-i SA20 asayamung mezüngbuba koka liasü. Pai Agarwal, Harry Brook*.

IPL nung team ka len anitsü atema renema ali mali ta asüngdangba mapang "Kechi atalaoktsü aji mejangja ajisüaka team achaayangertemi shiba nem team anidaktsüner aji parnoki telemtetba agitsü aser ibaji onoki pusemstü," ta ashi Markram-i SA20 asayaba mapang ashi.

"Captain mapaji ajak masü ajisüaka captain mapa abentsü atema ni renema lir aser ni iba mapa ya abentsü jangrar," ta pai Pretoria Capitals den SA20 final masaya tsüngda ashi.

IPL 2023 atema IPL team: Abdul Samad, Abhishek Sharma, Aiden Markram*, Bhuvneshwar Kumar, Fazalhaq Farooqi*, Glenn Phillips*, Kartik Tyagi, Marco Jansen*, Rahul Tripathi, T. Natarajan, Umran Malik, Washington Sundar, Anmolpreet Singh, Akeal Hosen*, Nitish Kumar Reddy, Mayank Dagar, Upendra Yadav, Sanvir Singh, Samarth Vyas, Vivrant Sharma, Mayank Markande, Adil Rashid*, Heinrich Klaasen*, Mayank Agarwal, Harry Brook*.

BILEMDANGANG

"Alirongsen dang nungi tenüng tajungiji sentiba."